




Historia di Aruba: White Star, un bunita recuerdo di temponan bon di San Nicolas

October 16, 2019



San Nicolas: White Star, un grocery store di famia Tang, den B. van de Veen Zeppenveldstraat cu ta existi pa mas di 89 aña y loke ta haci nos mas curioso ta, con e famia a sa di mantene e tienda aki den su estado original pa oficialmente casi un siglo.

Arubanative.com a hiba un combersacion masha ameno y hopi interesante cu Sr. William Tang y cu permiso di su persona, Arubanative.com a dicidi di publica e informacion aki.

Historia di White Star

Na cuminsamento di siglo 20, Tang Toong, un hoben procedente di China a yega Aruba y tabata sondea e posibilidad pa habri un negoshi na Aruba, esaki tabata casu den e mesun tempo cu LAGO a haci su entrada na Aruba. Tang Toong no a perde pa gana y a escohe San Nicolas, e districto pa biba y pa lanta su negoshi. E tempo ey e caya principal tabata di tera y tabata tin masha tiki negoshi den e caya aki.



E tienda den su estado original

Forma su famia

Despues cu Tang a habri su Grocery Store ela bay China bay buska e amor di su bida, nan a casa y for di e matrimonio aki a nace 7 yiu, cual dos yiu so a keda Aruba y e otronan a bay buska nan porvenir den exterior.

Temponan bon di San Nicolas

Na aña 1929 Tang Toong oficialmente a registra su negoshi como White Star den B. Van de Veen Zeppenveldstraat, San Nicolas.

Durante e tempo bon di LAGO e caya principal di San Nicolas tabata florece cu varios negoshi y hopi bishitante. White Star tambe a disfruta di e tempo bon aki y tabata wordo hopi bishita especialmente pa e trahadornan di LAGO, tur dia di siman, e tienda aki tabata druk cu cliente.



Tempo di LAGO, tempo cos tabata bon pa commerciantenan di San Nicolas

Tang a diversifica su negoshi

E negoshi tabata bayendo hopi bon y Tang Toong a dicidi di habri un carniceria na banda di e grocery store. E ruman homber di su señora tabata maneha e carniceria aki, e carniceria tabata haya carni fresco for di abatoire, esey tabata tempo cu na Aruba mes nan tabata mata baca.

Tang Toong a bay sosega y famia a tuma over

Na aña 1990, Dios a tuma Tang Toong den su reino. E mesun tempo aki e famia a dicidi tambe di cera e carniceria y sigui cu e grocery store Semper famia Tang a biba na San nicolas, e dos yiunan cu a keda Aruba hunto cu nan mama a sigui cu e negoshi di Tang Toong.

E casa di defunto Tang Toong, ta na bida, pero tin su edad y no ta capas mas pa traha den tienda. E yiu homber cu yama William Tang hunto cu su casa actualmente ta manehando White Star.

E negoshi a keda manteni den su estado original

William a conta nos di arubanative.com cu nan a keda mantene e negoshi den su estado original desde cu su defunto tata a habri'e y a lague atras pa nan. E tranchetnan, toonbank, portanan etc. ta data for di prome cu 1929, casi un siglo bieu.

Segun William, tur cos a keda mescos, djes durante añanan e productonan naturalmente ta cambia.



Toonbank y forma di stiwa productu a keda mescos

E style di e cortinanan colga na e portanan ta algo cu su defunto tata a bin cune y durante aña a cambia e cortinanan pero nunca a laga e portanan sin un pida cortina na e parti ariba, esey ta pa yuda protega su productonan y su clientenan contra solo.



E cortinanan na halto pa protega contra solo y e dak di palo berde a keda original

Un otro cos cu sigur a cambia ta su clientela, e generacion di clientenan di e tempo bon di LAGO mayoria no tey mas. Pero te ainda White Star ta gosa di un grupo di cliente fiel, generacion nobo, otro tipo di cliente, pero cu ta keda contribui na e existencia di White Star.



E mosaican a keda mescos, cliente a cambia

White Star ta habri di Dialuna pa Diasabra for di 7.45 am te 12.00 y di 2.45 pm te 6.30 pm. Diaranson merdia y Diadomingo nan ta cera.

No ta sigur cu e siguiente generacion di Tang lo sigui cu White Star

William a conta nos di Arubanative.com cu te na e momentonan aki, den e siguiente generacion di famia Tang no tin mucho interes pa sigui cu e negoshi aki, mayoria lo a escoge un carrera caba. Pues no por bisa cu si e siguiente generacion di famia Tang lo continua cu White Star, e negoshi cu nan welo of bisawelo a establece na comienso di siglo 20.

Un cos ta sigur cu White Star a marca historia, White star a conoce temponan hopi bon y menos bon di San Nicolas. Hopi a bin y hopi a bay, pero White Star a sa di mantene su existencia y famia Tang a sa di mantene tambe den su estado original data for di prome cu 1929.



Reki , cashi y toonbank a keda mescos for di prome cu 1929

Na Aruba hopi di e negoshinan di antes no ta existi mas, y nos di Arubanative kier a invita tur nos bishitantenan pa bishita White Star y asina por mira con e shapnan di antes tabata musta 90 aña pasa, mira unda nos mayornan, nos welonan, nos bisawelonan tabata bay pa cumpra comestibles.



Actualmente den e tienda ainda tin e toonbank y tranchet nan di tempo cu e tienda a habri



botternan cu ta pone mangel aden pa bende



White Star den añanan 50 y den año 2018, no tin diferencia, su rond a cambia, pero e negoshi a keda mescos

Share this:



Like this:

Related

[Curtis Fraser \(POR\): Hotel Secrets Aruba, un suspiro di alivio pa San Nicolas](#)
June 28, 2019
In "Politics"

[Cla pa yuda mas hende haya trabou Tempo Aruba a habri nan di 2 localidad na San Nicolas](#)
August 28, 2017
Similar post

[Otmar Oduber: Cu POR den gobierno bo ta garantisa cu plannan di desaroyo economico na San Nicolas lo continua](#)
September 15, 2017
In "Politics"